

# **Lita Nampa 2 Paulalu Walkatjuṛa Iyantja Wati Ini Timitjilakutu 2 Timothy Nyangatja Nganmanytju Nyakula Wangkanytjaku**

Nyangatja lita kutjupa Godaku tjukurpa Paulalu walkatjunkunytja Timitjiku. Paluru panya ngura ini Rome-alanguru walkatjunu tjailangka nyinara, ka Timitjinya panya ngura ini Ipitjala nyinangi. Ka Paulalu lita nyangatja palulakutu iyanu Timitjilu mantjira nyakunytjaku munu nyakunytjatjanungku Jesuku walytja tjutangka wangkanytjaku.

Palu Paulanya panya Timitjiku pulkara mukuringangi munu palunya rawangku kulilpai panya paluru Ipitjala nyinara anangu Jesuku walytja tjuṭa kanyira atunymankupai. Ka ngura nyara palula anangu kutjupa tjuṭa Jesuku walytja purunypa nyinapai, palu panya Satantu tjananya ngunti kuraningi, kaya mulamulangku Jesunya waṇantja wiyatū. Panya wati maṇkurtu tjanala tjukurpa ngunti wangkara nintiningi tjukaruru-palku. Ka lita nyangangka Paulalu Timitjila wangkangu Tjukurpa Palya mulapa Jesunyatjara kutju mulamulangku kulintjaku munu Jesuku walytja tjutangka tjukurpa palunya kutju wangkara nintintjaku tjukurpa

tjukaruru kutju. Panya paluru mukuringangi Timitjinya tjana Godalawanu kutju nyinanytjaku tjukurpa mulata tjukarurungka.

**Tjukurpa nyanganpa ngarinyi:**

1:1-2 Paulalu ngañmanytju wangkanytja

1:3—2:13 Paulalu Timitjinya wangkara rapan-tja Jesunya rawangku wañantjaku

2:14—4:8 Paulalu Timitjila wangkanytja Godaku pulkara warkarintjaku munu Godaku tjukurpa tjukarurungku nintintjaku

4:9-22 Paulalu tjukurpa małatja wangkanytja

*Paulalu Timitjila Nganmanytju Wangkanytja*

<sup>1</sup> Uwa Timitji, ngayuluña Paulalu lita nyangatja nyuntumpa walkatjunanyi. Panya Godaluñi ngurkantara tjunu Jesuku Christaku tjukurt-jara warkarintjaku mununi witura iyanu tjukurpa paluru kalkuntjitja anangu tjutangka tjakultjunkunytjaku, panya paluru ngañmanytju kalkunu anangu tjuṭa Jesula Christala tjunguringkunyangka tjananya wankara titutjarangku kanyintjikitjangku. <sup>2</sup> Uwa, nyuntu ngayuku katja purunypa, kaña nyuntumpa pulkara mukuringkula lita nyangatja nyuntulakutu iyanı.

Ka Mama Godalu Mayatja Jesulu Christalu kulu nyuntunya pukultju pulkangku kanyinma munu nyuntunya kurunpa rapara pukułmanama ngaltunytyju pulkangku.

*Paulalu Timitjilanguru Godanya Walkuntja*

<sup>3</sup> Palu ngayulu nyuntulanguru rawangku Godanya wal̄kulpai nyuntu palunya wiruṛa wañannyangka. Iriti panya ngayuku tjamu

tjuŋangku Godanya waŋantjikitjangku nyanga alatji kuliningi, “Nyangatja iwara tjukaruru. Nyanga palulawanula anama.” Kaŋa ngayulu palu purunytjuŋtu Godanya purkaŋangku waŋantjikitjangku alatji kulilpai, “Nyangatja iwara tjukaruru. Nyanga palulawanuŋa anama.” Munuŋa Godala titutjarangku tjapilpai kaŋala mungangka, munuŋa palula tjapiŋa nyuntunya kulilpai watarkurintja wiyangku.<sup>4</sup> Munuŋa nyuntunya kulira ngayulu panyatja kulilpai, panya nyuntu mungaŋtu ngayuku ulanytja, munuŋa palulanguru pulkara mukuringanyi nyuntunya piruku nyakunytjikitja munu nyakula pulkara pukularintjtikitja.<sup>5</sup> Munuŋa nyuntunya kulira ngayulu pukultu kulilpai alatji, “Wati paluru kurunpa winki Jesuku mulamularingkupai palumpa tjukurpa tjukarurungku kulira.” Alatjiŋa kulilpai. Munuŋa piruku kulilpai nyuntumpa kami Lawatjanya munu nyuntumpa ngunytju kuŋlu Yunitjanya panya paluru pula ngaŋmampya Jesuku pulkara mulamularingu. Munuŋa kulilpai, mulapa nyuntu paluru pula purunypa pulkara mulamularingkupai kurunpa winki.

### *Paulalu Timitjinya Wangkara Rapantja*

<sup>6-7</sup> Uwa, mulapa nyuntu Jesunya tjukarurungku waŋani, kaŋa nyara palulanguru nyuntunya piruku wangkanyi ngulu wiya rapa ngaranytjaku kuntareringkunytja wiya. Kulinin panyatja? Panya mungaŋtu nyuntula katangka mara tjunu, kanta Godalu Kurunpa

Milmiltawanungku nyuntunya witulyanu palumpa war̄ka rapangku palyantjaku. Ka palulanguru nyuntu uti Godaku war̄ka nguluringkuwiyangku palyanma, panya Godalu Kurunpa Milmiltu nyuntunya nganañanya witulyankupai Jesuku walytja uwankara, nganaña ngulu wiyangku rapangku palumpa war̄ka palyantjaku munu aŋangu tjutaku kulu pulkara mukuringkunytjaku. Kurunpa nyara paluru panya nganañanya witulyankupai kuraku wituwitunnyangka wiyanmankunytjaku. <sup>8</sup> Paluru nganañanya kuŋpulpai, ka palulanguru nyuntu uti rapangku wangkama tjukurpa Jesunyatjara kunṭaringkuwiyangku. Munu ngayuku kulu kulira kunṭaringkuwiyangku wantima nyanga tjailelangka nyinanyangka. Panya Mayatja Jesuku tjukurpa wangkanyangkaniya tjarpatjunu nyangatja. Munuya tjinguru palangka nyuntunya kulu tjarpatjunkuku nyuntu palu purunyjtju tjukurpa wangkanyangka. Palu palya, Godalu nyuntunya kulu witulyankuku nguluringkuwiyangku palumpa tjukurpa rapangku wangkanytjaku. Ka palulanguru ngayulu purunyjtju tungun-tunguntu palumpa tjukurpa wangkama rapangku munu kutjupa tjuṭangku nyuntunya anara kurannyangka kulira wantima.

<sup>9</sup> Panya Godalulanya ngurkantanu munulanya wankarunu palumpa katja uŋtalpa palya mulapa nyinanytjaku. Palu tjingurula kulini nyanga alatji, “Godalu-mantilanya ngurkantanu palya nyinara wiru tjuṭa palyannyangkampa.” Palu

wiya, paluru alatjiṭu walytja mukuringkula kulira nganañanya ngurkantanu ngaltunytju pulkangku. Panya kuwaripatjara manta paluntja kuwaripangkalpi paluru kulinu nganañanya ngaltunytjungku kanyintjikitjangku. Nyara palula arã alatjiṭu kuwaripatjara paluru kulinu palumpa katja ngula iyantjikitjangku nganampa ngalkilpa ilunytjaku. <sup>10</sup> Ka panya paluru mantakutu pitjangu Jesunya Christanya panya, munu nganampa ngaltunytju pulka mulapa ngalkilpa anga-ilungu nganañanya-tjiratja, munulanya kuranguru wankarunu ilura ngura kurakutu ankunytjaku-tawara. Nyara paluru panya ilunytjatjanu wankaringkula pakañu munu nganañala Tjukurpa Palya utira tjakultjunu, kala nganaña kuļu palumpa mulamularingkula ilunytjatjanu wankaringkula pakalku munula Godala tjunguringkula wanka titutjara nyinaku. Nyara palulan-gurula kulini panya Mayatja Godanya nganampa ngaltunytju mukulya pulka mulapa nyinanyi, kala ilunytjikitjangku kulira nguluringkunytja wiya rapa ngarama, panya nganaña palumpa mulamularingkula ilunytjatjanu wankaringkula pakalku Godala tjunguringkula titutjara nyinanytjikitja.

<sup>11</sup> Ka panyañi Godalu mulapa ngurkantara tjunu Jesuku Christaku tjukurtjara warkarinytjaku, mununi witura iyanu Tjukurpa Palya Jesunyatjara anangu tjuṭangka wangkara nintintjaku. <sup>12</sup> Ka panyañiya tjukurpa nyanga palulanguru ngayunya kuralpai mununiya kuvari nyanga witira tjailangka tjarpatjunu. Palu ngayulu nyangangka nyinara

kunṭaringkunytja wiya rapa nyinanyi, panya ngayulu Jesuku mulamularingkula palumpa ninti pulka nyinanyi. Panya paluruṇi war̄ka ungu palumpa Tjukurpa Palya aŋangu tjutangka wangkanytjaku, munu tjukurpa palunya paluru rawangku tjukaruru kanyilku, tjintu małatjakutu-wangkara kutjupangku ngunti kampa kutjupankunytjaku-tawara.

<sup>13</sup> Ka Timitji, ngayulu panya nyuntula tjukarurungku tjakultjunu Tjukurpa Palya Jesunyatjara. Ka nyuntu nintiringkunytjatjanungku tjanala ngapartji tjukarurungku wangkara nintinma tjukurpa panya palunyatu. Munu alatji war̄karira Jesuku rawa mulamularingama wantinytja wiya munu aŋangu tjutaku pulka mukuringama Jesulu nyuntunya witulyankunyangka. <sup>14</sup> Panya Godalu nyuntunya Tjukurpa Palya ungu mununta nintinu tjukarurungku wangkanytjaku aŋangu tjutangka. Ka nyuntu tjukurpa palunya tjukaruru mulatu wangkara utinma, munu aŋangu kutjupangku tjukurpa palunya ngunti kalikali wangkanyangkampa kulira palunya tjukarurunma. Munu kulinma panya Kurunpa Milmilnga ngananałala uwankarangka unngu nyinanyi mununta nyara paluru alpamilani tjukurpa palunya rawangku tjukarurungku wangkara nintintjaku.

<sup>15</sup> Uwa Timitji, nyuntu ninti panya Jesuku walytja tjutangkuṇiya ngura nyara Aitjala nyinapai tjutangku wantingu alatjitu tjailangka tjarpatjunkunyangka alpamilantja wiyangku. Munuṇi wati panya Pikilatjalu pula Amatjanilu

kulu palu purunypatu wantingu alatjitu alpamilantja wiyangku. <sup>16-17</sup> Palu wati kutjungkuni ini Anitji-puralu ngayunya pitjala nyangangi. Paluru kunyu ngura nyanga Rome-ala wirkara wali kutjupangka kutjupangka ngayuku para-nguriningi munu tjailangka nyinanytja kulira wantintytja wiya pitjala ngayula tjukaruru wirkanu mununi kurunpa pulkara pukulmanu. Kana nyara palulanguru Mayatja Jesula tjapini wati panya palumpa walytja tjutaku ngaltunyjtungku wirura kanyintjaku. <sup>18</sup> Mununa palumpa kulu Godala tjapini alatji wangkara, “Mayatja Jesu, ngula tjintu maletjangka nyuntu aŋangu tjuta ngurkantara tjaralku nyuntumpa walytjapiti munu nyuntunya wantipai tjuta. Tjintu nyara palula Anitji-puraku ngalturingama munu palunya kulu ngurkantanama nyuntumpa walytja nyinanytjaku.” Alatjina palumpa tjapini. Ka Timitji, nyuntu ninti wati nyanga palumpa, panya paluru kutjungku ngayunya wirura alpamilaningi ngura nyara Ipitjala. Panya nyara palula nyuntu ngayula tjungu nyinara palunya nyangangi ngayuku wirura rawangku palyannyangka.

## 2

### *Jesunya Rawangku Wan'anma*

<sup>1</sup> Palu wati wiru kulila, nyuntu ngayuku katja purunypa, kana nyuntunya wangkanyi Jesula Christala tjungu titutjara ngaranytjaku, ka paluru nyuntunya kunpulku. Panya

nganana palula tjungu ngaranyangka paluru ngananya mukulyangku atunymara kanyilpai. <sup>2</sup> Nyuntu panya kuliningi ngayulu aŋangu tjutangka mirangka Godaku tjukurpa Jesunyatjara wangkara nintinnyangka. Ka nyuntu tjukurpa nyanga palunyaŋ aŋangu wangaŋara tjutangka wangkara nintinma. Ka tjana ngapartji aŋangu tjutangkalta matjakultjunkuku.

<sup>3</sup> Palu kulila, nyuntu aŋangu tjutangka Jesuku tjukurpa wangkanyangkaya kutjupa tjutangku panya ngayuku purunypa nyuntumpa ngapartji mirpaŋarira pikaringkuku. Ka nyuntu nguluringkuwiyangku tungun-tunguntu Jesuku war̄ka palyanma, panya watı tjaultji purunyŋju, panya paluru pikaringkunyangka ngulu wiya alatjiŋu rapa ngarapai, palu purunypa nyuntu Jesuku war̄karira rapa ngarama.

<sup>4</sup> Palu wanyu kulila, kaŋanta ara maŋkurpa tjakultjura nyuntu kulira nintiringkunytjaku. Nganmanytjuŋa tjakultjunanyi watı tjaultji tjutaku ara. Panya tjaultji tjutaya palumpa tjanampa mayatjaku kutju wangaŋara war̄karipai palunya kutju pukulmankunytjikitja munuya kutjupa tjutaku war̄karipai wiya alatjiŋu. Ka nyuntu palu purunypa Jesuku Christaku kutju pulkařa war̄karima palunya pukulmankunytjikitja.

<sup>5</sup> Mununa piřuku ara kutjupa tjakultjunanyi watı wirtjapakantjatjara. Panya aŋangu tjutangka mirangka watı pulkařa wirtjapakalpai kuranyu alatjiŋu wiru mantjintjikitja. Palu tjinguru paluru ngururpa wirtjapakara

angatjunkunyangka aŋangu tjutangku palunya mirawaŋira wiru ungzunyta wiyangku wantiku. Paluru tjinguru pulkara wirtjapakanma, palu wiya. Ka Timitji nyuntu pala palu purunypa arkalwiyangku wantima munu tjukarurungku Jesunya waŋanma, kanta paluru nyakula mirawaŋira wiru ungzuku.

<sup>6</sup> Munuŋa aŋa kutjupa małatja tjakultjunanyi nyuntu kulira nintiringkunytyaku wati panya kaana kanyilpaitjara. Wati paluru panya mantangka pulkara warkaripai pakuringkunyta wiya munu mai pulka pakaltjingalpai munu ngula mai kururingkunyangka paluru kaṭara uralpai munu paluru-warara pulkara warkarintytatjanungku mai ngañmanytyu mantjilpai palurunku, kaya kutjupa tjutangku mała mantjilpai. Ka Timitji, nyuntu palu purunypa Jesuku pulkara warkarima pakuringkuwiya, kanta paluru nyuntunya atunytyu kanyilku.

<sup>7</sup> Uwa, aŋa nyanga mañkurnguru kulinma purkarangku nintiringkunytyikitjangku, kanta Mayatja Jesulu nyuntunya tjukarurungku kulin-tjaku nintilku.

<sup>8</sup> Uwa, Jesunya Christanya tungun-tunguntu wañantjikitjangku palunya titutjarangku kulinma watarkuriwiyangku, panya paluru Mayatja Davidaku pakali małatja mulapa, ka panya Godalu palunya ilunyangka wankara pakaltjingaŋu. Kaña tjukurpa nyanga wiru palunya aŋangu tjutangka tjakultjunkupai. <sup>9</sup> Kaniya tjukurpa nyanga palunya wangkanyangka tjailangka witira tjarpatjunu munuŋiya tjiinangka karpira

kanyini wati kuralpai-palku. Palu palyaya ngayunya karpi<sup>ra</sup> kanyini, palu tjana Godaku tjukurpa pu<sup>tu</sup> wiyan<sup>i</sup>. Panya Tjukurpa Palya Jesunyatjara ngura winkingka lipiringanyi, kaya anangu winkingku kulini. <sup>10</sup> Nyara palulanguru<sup>na</sup> rawa warkarinyi kutjupa tjutangku ngayunya kurannyaangka kulira tjituru-tjitururintja wiya. Panya Godalu anangu kutjupa tjuta kulu ngurkantanu Jesulawanungku wankarunkunytjikitjangku, kaya palumpa walytjaringkula palula tjungu titutjara nyinaku pukulpa mulapa. Nyara palulanguru<sup>na</sup> palula tjanala ku<sup>lu</sup> Tjukurpa Palya tjakultjunanyi paluru tjana ku<sup>lu</sup> kulira wankaringkunytjaku, mununa mirpa<sup>ntju</sup> tjutangku ngayunya markunnyaangka kulira wantipai ilunytja kulira nguluringkunytja wiyangku.

<sup>11</sup> Uwa, utila Jesunya Christanya tunguntungunu wañanma, panya tjukurpa wiru nyanga alatji ngaranyi tjukaruru mulapa, “Nganana kura wantirampa Jesula tjunguringkula palula tjungu wanka titutjara nyinaku.

<sup>12</sup> Nganana palunya titutjarangku wanarampa ngula palula tjungu mayatjarira nyinaku. Palu tjinguru nganana Jesuku ngurparingkunyangkampa, paluru ngapartji nganampa ngurparingkuku<sup>tu</sup>.

<sup>13</sup> Nganana kutjupa-ara kalkuntjatjanungku palyalpai wiya. Palu Godalu kalkuntjatjanungku palyalpai alatji<sup>tu</sup>, tjukarurungku.

Panya paluru wangkanytjatjanungku walytjangku anantja wiya alatjiṭu.”

### *Godaku Warka Wanganarangku Palyanma*

<sup>14</sup> Uwa Timitji, tjukurpa nyanga palunya tjananya Jesuku walytja tjutangka rawangku wangkara nintinma watarkurinytjaku-tawara. Munu Godala mirangka tjananya markunma tjukurpanguru ngaparku wangkawiya nyinanytjaku. Panya paluru tjana alatji rawangku wangkara kuraringanyi Jesula kunpuringkunytja wiya. Kaya tjinguru kutjupa tjutangku tjanala ngaparku wangkanyangka kulira kuraringkukuṭu munuya palulanguru tjinguru Jesulanguru paturingkuku. <sup>15</sup> Ka Timitji, nyuntu Godaku pułkara warkarima pakuringkuwiya paluru nyakula pukularinytjaku. Munu tjanala Godaku tjukurpa tjukarurungku nintinma purkarangku, ngunti wangkara kūntaringkunytjaku-tawara.

<sup>16</sup> Panya anangu kutjupa tjutangkuya tjukurpa ara tjukutjuku tjuta unytjungku wangkapai, tjukurpa mantatja tjuta. Ka nyuntu palunya tjananya kulira wantima munu maunṭalpa nyinama, panya alatji rawangku wangkaraya paluru tjana Godalanguru ma-paturinganyi munuya ma-paturingkula palumpa watarkurinyi. <sup>17</sup> Panya tjukurpa tjanampa lipiringkupai, nyaa purunypa panya pikä kunmaṇu purunypa, panya pikä paluru miringka nyinakatira miritjina wiyangka pułkaringkupai munu puntu winki kuralpai, palu purunypa tjanampa tjukurpa anangu

tjuṭangka lipiringkupai, kaya uwankara makuraringkula Godalanguru paṭuringkupai.

Panya wati Yama-nitjalu pula Palitalu tjukurpa kurakura nyanga purunypa tjuṭa anangu tjuṭangka ngunti nintiningi. <sup>18</sup> Panya paluru pula Godaku tjukurpa tjukaruru wantingu munu pula kuwari tjukurpa kutjupa kulira ngunti wangkara nintini Jesuku walytja tjuṭangka. Munu pula ngunti wangkapai nyanga alatji, “Tjin̄tu panya paluru ngan̄manypa ngarala wiyaringu panya Godalu anangu ilunyjtjitja tjuṭa wankara pakaltjingantja.” Alatji pula nintilpai ngunti. Kaya anangu kutjupa tjarangku kulira palumpa pulampa mulamularingu munuya palulanguru ngunti kulira Godalanguru ma-paṭuringu, palumpa pulampa tjukurpa kulintjatjanu. <sup>19</sup> Palu kulila, Godalu panya palumpa walytjapiti ngurkantanu munu tjananya atunymara kanyini palula tjungu kunpu nyinanytjaku, ka kutjupangku tjananya puṭu kuraṇi. Ka nyanga palumpa tjanampa ara kutjara ngaranyi. Kutju ngaranyi alatji,

“Panya Godanya ninti palumpa walytja tjuṭaku.”

Ka kutjupa nyanga alatji ngaranyi,

“Nyuntu Jesunya mayatjanmaṛampa kura uwankara wantima munu palyanyku nyinama.”

<sup>20</sup> Palu kuwariṇa tjukurpa ara kutjupa tjakultjunanyi nyuntu kulira nintiringkunytjaku alatji, panya anangu mani pulkatjara wali wirungka nyinapai munu paluru pulita, panikina, piti kutjupa kutjupa tjuṭa kulu

walingka kanyilpai. Ka piti kutjupatjara puli gold-nguru munu tjiilpanguru palyantja wiru mulapa ngaripai. Ka piti kutjupa tjuta puñunguru tjulpirnguru palyantja kurakura tjuta ngaripai. Ka wati paluru mai ngalkuntjikitjangku pulita piti kurakura mantjilpai puñunguru tjulpirnguru palyantja. Palu tjinguru paluru mai pulka palyara altiku mayatja kutjupa tjuta palumpa ngurangka tjunguringkula ngalkuntjaku. Munu paluru pulita panikina piti wiru tjuta ngurkantara taipulangka tjunkuku gold-nguru tjiilpanguru palyantjitja, kaya pitjala pitjala wiru tjutangka ngalkula tjikilku.

<sup>21</sup> Ka nyanga palu purunypa ngaranyi Jesuku waltytja tjutaku. Panya kutjupangku kura wantira tjukaruru palyanyku nyinanytjikitja mukuringkunyangka Godalu palunya ngurkantankuku war̄ka wiru palumpa palyantjaku. Panya anangu nyara paluru Mayatja Jesula wangañarangku kulilpai palumpa war̄ka kutju palyantjikitja mukuringkula. Ka Mayatjalu palumpa pukularira war̄ka wiru tjuta palunya ungkuku paluru wangañarangku kulira palyantjaku.

<sup>22</sup> Ka Timitji, nyuntu Godaku war̄ka wiru palyantjikitja mukuringkula nyanganpa kulila. Panya yangupala tjuta kura kutjupa kutjupa tjuta palyantjikitja mukuringkupai, palu nyuntu palunya tjananya arkantja wiyangku wantira palyanyku nyinama. Panya Jesuku waltytja kutjupa tjutangku kura wantintytjatjanungku Godanya tjukarurungku

wañantjikitja mukuringanyi, ka nyuntu tjanala tjunguringama munu tjana puруnytju rawangku kulinma Godalawanu tjukaruru palyanyku nyinanytjikitjangku munu palumpa pulkara mulamularingama, munu aŋangu tjutangka mukulya pukultju nyinama tjanala tjungu.

<sup>23</sup> Ka aŋangu kutjupa tjutangku tjukurpa tjukutjuku tjuta kulira rawangku ngaparku wangkapai. Ka Timitji, nyuntu tjanala tjunguringkuwiya maunyalpa nyinama, panya tjana pina pati munuya unytjungku rawangku ngaparku wangkapai wiyanguru alatjitu. <sup>24</sup> Palu Mayatja Godaku warkaripai tjuta uti ngaparku wangkanytja wiya nyinama munuya uti aŋangu kutjupangku pikaringkula wangkanyangka ngapartji wangkanytja wiyangku wantima. Uti Godaku warkaripai tjuta ngaltunytyju mukulya pulka nyinama, munu aŋangu tjutangka purkarangku wangkara nintinma mirpaŋariwiyangku. <sup>25</sup> Munuya uti kutjupa tjutangku tungunpungkula wangkanyangka palunya tjananya purkarangku wangkara tjukarurunma. Ka Godalu tjinguru palunya tjananya małakungku arurilyilku Tjukurpa Palyaku mulamularingkunytjaku. <sup>26</sup> Panya mamu Satantu tjananya ngunti kuraňu palula wanganarangku kulintjaku munu tjananya karpira kanyini. Palu Godalu nintinnyangkaya tjinguru kulira Godalakutu małaku aruringkuku.

*Tjintu Małatja Ilaringkunyangka Anangu  
Tjuta Kuraringkunytja*

<sup>1</sup> Palu wanyu kulila, panya tjintu małatja ilaringkunyangka kura kutjupa kutjupa tjuta wirkankunyangka wituwitu pulka ngaraku Jesuku walytja tjutaku. <sup>2</sup> Panya nyara palula arā anangu tjutangku tjananku kutju kulira palyalku, kutjupa tjutaku ngalturingkunytja wiyangku. Ka kutjupa tjutangku mani kutju pulkara kulilku, munuya kañany-kañanypa ngarala tjananku mirawañiku. Ka kutjupa tjuta tjaā kuraringkuku munuya ngunti tjuta kutju wangkaku, munuya mamangka ngunytjungka pulkara tungunpungkuku, munuya wiru tjuta ungkunyangka pukularintja wiyangku wantiku, munuya rawa alatjiū Godala tungunpungkuku. <sup>3</sup> Kaya kutjupa tjutangku anangu kutjupa tjutaku nyakula ngalturingkunytja wiyangku alatjiū wantiku. Ka anangu kutjupangku kutjupa tjutaku kuraringkula malangka kuntaringkula palumpa tjanampa kalyparingkunytja wiyangku alatjiū wantiku. Kaya kutjupa tjutangku anangu tjuta ngunti ngukara kuranmankuku. Kaya kutjupa tjutangku anangu kutjupa tjutaku mapalku pikaringkula tjananya pungkuku ngalturingkunytja wiyangku, panya tjana putu kulilku purkarangku kulira tjukaruruntjikitjangku. Munuya paluru tjana anangu kutjupa tjuta wirura nyinanyangka nyakula tjananya kurara pungkuku, panya tjintu nyara paluru ilaringkunyangka tjana kura tjutaku kutju pulkara mukuringkuku.

<sup>4</sup> Uwa, ka kutjupa tjutangku malpa tjuṭa ngunti kuralku panya tjanampa ngañmanypa mukulya nyinanytjatjanungku tjananya wantiku. Kaya kutjupa tjutangku purkaṛangku kulira palyantja wiyaringkuku munuya warpungkula kutju palyalku atatjura kulintja wiyangku. Munuyanku kañany-kañanytju walytjangku kutju mirawaniku, munuya Godaku mukuringkunytja wiyaringkula tjana mukuringkunytjitja kutju palyantjikitja mukuringkuku tjananku walytjangku pukulmankunytjikitjangku. <sup>5</sup> Kaya kutjupa tjuṭa Jesuku walytja-palku nyinaku, palu tjana unngu palumpa mulamularingkunytja wiyaringkuku. Ka nyuntu tjananya nyakuku rawangku tjana Godala tungunpungkula kura kutju palyannyangka munun nintingku kulilku, “Munta, nyanga tjana Jesuku walytja wiya.” Munu palulanguru tjanala tjunguringkuwiyangku wantima alatjitu.

<sup>6-7</sup> Palu aŋangu nyanga kuralpai tjutangkuya minyma kutjupatjara ngunti wangkara wituwitulku tjanala wanganarangku kulintjaku. Panya minyma nyara paluru tjanaya kawakawa ngunti kulilpai, munuya iwara kurangka kutju titutjara ngarapai. Kutjupa-araya kura palyantjatanu kunṭaringkupai, palu małangkaya piruku kura panya palunyatu palyantjikitjangku kulilpai munuya titutjara Godala mirangka kunṭaringkupai. Munuya paluru tjana tjukurpa kutjupa kutjupa tjuṭa kutju rawangku kulilpai munuya puṭu kulilpai, “Yaaltji tjukurpa tjukaṛuru mulapa?” Palulanguruuya

añangu panya kuralpai tjutangku minyma panya palumpa tjanampa ngurangka tjarpara tjukurpa wiru-palku tjanala wangkapai, kaya kulira mapalku mulamularingkupai.

**8-9** Uwa Timitji, nyuntu añangu panya ngunti kuralpai tjuta tjananya wantima alatjitu, panya paluru tjana wati ini Tjanitjanya pula Tjampurinya purunypa nyinanyi. Panya iriti pula Mosela tungunpungangi paluru Godaku tjukurpa wangkanyangka. Ka panyaya añangu uwankara palumpa pulampa nintiringu kura nyinanyangka, ka panya Godalu pulanya painu palumpa tjukurpa wantinyangka. Palu purunyti Godalu añangu nyanga ngunti kuralpai tjuta ku lu pulkara pailku tjana palumpa Tjukurpa Palya Jesunyatjara ngunti wangkara kurannyangka. Kaya palu purunypatu añangu tjutangku tjanampa nintiringkula ngurkantankuku tjana kura nyinanyangka, kaya paluru tjana pulkara kuntingkuku munuya añangu mañkur-mañkurpa kutju Godalanguru kurara maunṭara katiku tjukurpa ngunti wangkara.

### *Godaku Tjukurta Wanganarangku Kulina*

**10** Palu Timitji nyuntun tjananya purunypa wiya. Panya nyuntu purkarangku kuliningi ngayulu añangu tjutangka Tjukurpa Palya Jesunyatjara wangkara nintinnyangka. Munu panyañin nyangangi ngayunya Godalawanu tjukaruru nyinara palumpa warika rawangku palyannyangka wantintja wiyangku. Nyara palulanguru nyuntu nintingku kulini panya

ngayulu Godanya kutju kulilpai palunya pukułmankunytjikitjangku. Nyuntu ninti panya ngayulu Jesula Christalawanu raparinganyi. Nyuntu panyañin nyangangi, munun nintiringu panya ngayulu Jesuku walytja tjutaku pulkara mukuringkupai mununa palunya tjananya purkałangku wangkara nintilpai mirpañarinytja wiyangku. <sup>11</sup> Munu panyañin nyangangi anangu tjutangku anara pikaringkunyangka ngura panya Antiyakala, Akani-yamala, Litjurala tjanala. Panya ngura nyara palula tjanalaniya painingi Godaku tjukurpa wangkawiyangku wantintyjak. Palu ngayuluna tungun-tunguntu wangkangi kañiya pika pulka mulapa pungangi. Palu Mayatja Jesuluñi rawangku wankarura kanyiningi.

<sup>12</sup> Palu nyangatja tjaka panya anangu tjuta Jesuku Christaku walytja nyinanyangka nyakulaya anangu kuralpai tjutangku palunya tjananya kurara pungkupai Jesunya wañalwiyangku wantintyjak. <sup>13</sup> Panya manta winkingkaya anangu kuralpai tjuta nyinanyi. Paluru tjana wangkapai, “Nganana Jesuku walytja nyinanyi.” Palu wiya tjana kura kutju rawangku palyantjikitja mukuringkupai munuya palulanguru kura rawangku palyantjatanu pulkara mulapalta ma-kuraringkupai. Panya palunya tjananya mamungku ngunti kuralpai, kaya palu purunytjutu anangu kutjupa tjuta ngunti kuralpai.

<sup>14</sup> Palu Timitji, nyuntu panya paluru tjana purunypa wiya. Panya nyuntunyaya

ngañmanytju nintinu tjukurpa tjukaruruku Jesuku panya walytja kutjupa tjutangku, ka panyan nintiringkunytjatjanu Jesuku Christaku mulamularingu alatjitu. Kaña kuwari nyuntula wangkanyi tjukurpa tjukaruru palunya titutjarangku wanganarangku kulintjaku uparingkula wantinytja wiyangku. Nyuntu panya ninti tjanampa nyara nyuntunya nintilpai tjutaku, panya paluru tjana nyuntula tjukarurungku wangkara nintiningi. <sup>15</sup> Palu nyuntu panya tjitjilpi nintiringangi Godaku tjukurku panya nyiri milmilta ngarinytjatjaku. Munu panyan nyara palulangurulta nyuntu pulkaringkula tjukurpa palunya rawangkutu kuliningi watarkurinytja wiyangku. Munu panyan tjukurpa palumpa nintiringkunytjatjanungku kuliningi Jesuku Christaku mulamularingkunytjikitjangku, ka panya nyuntunya wankarunu.

<sup>16</sup> Panya tjukurpa nyanga nyiri milmilpa Godaku alatjitu, panya Kurunpa Milmiltu nintinnyangkaya Godaku wangkatjara tjutangku iriti nyiringka walkatjunu. Ka tjukurpa paluru palya mulapa ngaranyi aŋangu tjutangku kulira nintiringkunytjaku. Ka panyala tjukurpa nyanga palunya kulintjatjanungku aŋangu kutjupa iwara kurangka ankunyangka nyakula pailpai. Munula palu purunypatu aŋangu kutjupangku ngunti palyannyangka nyakula tjukurpa nyanga palulanguru wangkara palunya tjukarurulpai paluru kulira Godalawanu tjukaruru nyinanytjaku. <sup>17</sup> Uwa, tjukurpa nyanga paluru wiru mulapa ngaranyi

nganana Godaku walytja tjuṭangku kulira nintiringkunytjaku. Nyanga palulanguru kutjula pulkaṛa nintiringkunytjatjanungku nganana wiru tjuṭa kutju palyalku.

## 4

**1-2** Uwa, ngula Jesulu mayatja pulka mulatu małaku pitjala aŋangu uwankara ngurkantara tjaralku nganmanypa ilunytja tjuṭa munu wanka nyinanytja tjuṭa kuļu. Kaña nyara palulanguru nyuntunya kuwari wangkanyi Godaku tjukurpa aŋangu tjuṭangka tjakultjunkunytjaku pakuringkuwiyangku. Nyangatjana Godala munu Jesula Christala mirangka nyuntunya wangkanyi, ka mulamulangku kulira wangkama. Kaya tjinguru kulira pukulariku, munta tjinguruya kulira wantiku. Palu nyuntu tjanala wangkama alatjiṭu wantinytja wiyangku. Munu tjananya kura palyannyangka nyakula painma kura wantinytjaku, munu tjananya wangkara kuļu tjukarurunma Godalawanu tjukaruru palyanyku nyinanytjaku. Palu tjananya purkarangku wangkara nintinma mukulyangku mirpanarintja wiyangku tjana kulira wanganararingkula Jesunya tjukarurungku waṇantjaku.

**3** Kuwariya aŋangu tjuṭangku nyuntula wanganarangku kulini Godaku Tjukurpa Palya wangkanyangka. Palu ngula tjana tjukurpa tjukaruru wangkanyangka kulintja wiyaringkuku munuya tjukurpa kutjupa tjuṭaku mukuringkuku tjukurpa panya tjana mukuringkunytjitu kutju, munuya

anangu nintilpai kutjupa tjuṭa altiku tjukurpa palunya tjananya kutju tjanala wangkanytjaku. Munuya kulira pukulariku tjana ngunti wangkanyangka. <sup>4</sup> Panya paluru tjana tjukurpa tjukaruru ngañmanytju kulintjatjanu tjukurpa palumpa watarkuriku munuya wantiku, munuya tjukurpa mantatja tjuṭa kutju kulira titutjarangku wañarinkuku.

<sup>5</sup> Palu Timitji, nyuntu purkarangku kulira palyanma tjituru-tjitururinytja wiyangku. Tjinguruya nyuntunya anara kuranma, tjinguruya nyuntunya pungama munu paira iyanma. Palu nyuntu tungun-tungunpa alatjitu ngarama pika kulintja wiya, munu Jesunya tjukarurungku wañanma tjukurpa ngunti tjanampa kulintja wiyangku. Munu Tjukurpa Palya Jesunyatjara rawangku para-wangkama anangu uwankarangka munu ngururpatu pakuringkula wantinytja wiyangku Godaku warka wangañarangku alatjitu palyanma.

<sup>6</sup> Panya alatjitu tjintu ilaringu ngayulu manta nyangatja wantikatira ankunytjaku. Kanatju kuvari puntu winki Godanya unganyi, panya Moseku tjukurtjarangku kuka pungkula Godanya ungupai nyakula pukularinytjaku, palu purunytju ngayulu kuvari puntu winki Godanya unganyi. <sup>7</sup> Panya ngayulu Godaku pulkara warkaringi pakuringkuwiya mununa ngatalpa wantinytja wiyangku warka uwankara wiyanu. Panya anangu waintarinetykitja pulkara wirtjapakalpai munu ngururpa ngarakatinytja wiya rawa wirtjapakara waintarira mulyangka wirkankupai, palu

purunypa ngayulu kuwari wirkana, tjukurpa Godaku aŋangu tjutangka rawangku tjukarurungku nintintjatjanu.<sup>8</sup> Katju Godalu ngayuku pukularira wiru mulapa kanyini ngayunya ngula ungkunytjikitjangku. Panya Tjiñtu Małatjangka Mayatja Jesulu aŋangu uwankara tjukarurungku ngurkantara tjaralku. Munuňi nyara palula-aralta ngayunya ungkuku, kaña palula tjunguringkula titutjara nyinaku. Palu paluru ngayunya kutju ungkunytja wiya palumpa walytja uwankara kuļu ungkuku palula tjunguringkula titutjara nyinanytjaku. Panya nganaña uwankara ala-alä pañani paluru małaku pitjanytjaku.

### *Tjukurpa Malatja*

<sup>9-11</sup> Palu malpa wiru, wanyu warķa nyuntumpa mapalku palyara wiyla munu ngayulakutu warpungkula pitja. Munu wanyu wati panya Markanya kuļu altira ngalya-kati ngayunya pitjala alpamilantjaku, panya paluru wirura warkaripai.

Uwa, nyangatjali Luke-anja ngali kutjara nyinanyi panya malpa kutjupa tjutaya anu. Panya wati Timatjalu mantatja tjutaku mukuringkula ngayunya wantikatira anu ngura Tjitja-lanikalakutu, ka wati panya Karitjannga kuļu anu manta nyara Kalaitjijyalakutu. Ka Taitatjanya anuňu ngura ini Talumaitjiyaku.<sup>12</sup> Kaña Titjikatjanya iyanu ngura nyara Ipitjalakutu.<sup>13</sup> Ka Timitji, nyuntu ngura pala Taruwatjalawanu pitjalampa wanyu mantjira ngalya-kati ngayuku panya

mantara, panya wati Kaapaku ngurangkana watarkurira wantikatingu. Munu ngayuku panya nyiri rulumapi tjuta kuļu mantjirā ngalyakati, panya tjuna-tjunaŋguru palyantja tjuta munu nanikuta miringuru palyantja tjuta. Palu nyara miringuru palyantja tjutakuña pułkara mukuringanyi, ka palunya tjananya watarkurintja wiyangku ngalya-kati.

<sup>14</sup> Palu Timitji, nyuntu panya ninti wati panya Alika-tjantaku. Panya paluru kutjupa kutjupa tjuta ayananguru palyalpai. Wati nyara paluru panyani pułkara kuranu. Ka palunya ngapartji Godalu pika pułka ungkuku. <sup>15</sup> Panya paluru tjukurpa wangkanyangka ngayunya pułkara wiyanmara ananangi. Ka nyuntu palunya ngulu nyangamaṭu nyuntunya kuļu kurantjaku-tawara.

<sup>16</sup> Panya kuwaripatjaraṇi mayatja pułkangku ngayunya witira kuutpangka wangkanytjaku tjunu, ka kutjupangku pakara ngayulanguru alpamilara anga-wangkanytja wiya alatjitu. Panya malpa uwankarangkuniya wantikatira anu. Palu palya, ngayulu Godala tjanampa tjapini pungkunytja wiya tjanampa kalyparingkunytjaku. <sup>17</sup> Palu ngayulu kuutpangka ngaranyangka Mayatja Jesunya ngayula tjungu ngarangi, mununi rapara witulyanu palumpa tjukurpa winki utira tjakultjunkunytjaku anangu nyanga Jew wiya uwankarangka. Munuṇi wankarunu, panya tjana ngayunya iluntankunytjikitja mukuringangi. <sup>18</sup> Uwa, Mayatjaluṇi titutjarangku atunymananyi kura tjutangka-tawara, munuṇi wankara

katiku ngura ilkaritjakutu palula tjungu titutjara nyinanytjaku. Kala wanyu palunya titutjarangku walkura mirawañima witulya pulkanya. Uwa mulapa.

<sup>19</sup> Uwa Timitji, ankula minyma panya Puritjilala munu palumpa kuringka Akuwilala kuļu wangka panya ngayulu pulanya rawangku kulini. Munu wati Anitji-puraku waļingka nyinanytja tjuta kuļu palu purunypatu wangka.

<sup>20</sup> Ka wati panya Iratjatjanya pitjanytja wiya ngura nyara Karintjala ma-nyinanyi. Kaņa wati ini Turu-pimatjanya wantikatingu ngura nyara Mailitatjala, panya paluru pikatjararingu.

<sup>21</sup> Palu Timitji, wanyu mapalku pitja wari kuwaripangka.

Kaya kuwari aŋangu nyangantu nyuntunya kulini ini Upu-latjalu, Putantu, Lainatjalu, Kulutiyalu tjana. Nyanga paluru tjana uwankarangku nyuntunya kulini nyuntumpa pukularira. Kaya Jesuku walijtja kutjupa tjuṭangku kuļu palu puṛunytijuṭu ngayunya wangkangu nyuntula wangkanytjaku.

<sup>22</sup> Uwa Timitji, alatjituña walkatjunanyi. Ka Mayatja Jesulu nyuntula tjungu nyinara nyuntunya rapara pukulmanama, munu nyuranya uwankara pukultju pulkangku kanyinma.

**Tjukurpa Palya  
Portions of the Holy Bible in the Pitjantjatjara  
language of Australia**

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

---

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6